

摛藻堂四庫全書薈要

集部

欽定四庫全書叢書要

集部

大全集卷三
一至三



詳校官候補通督經歷臣郭祚熾

御製秋夕讀高青丘大全集

碧潭秋水清寒山月白水月兩澄明中有靜觀客披
襟樂容與爽籟生几席偶讀青丘詩尚友獲莫逆短作
珠璣長歌戛金石不事追琢巧渾渾含光澤伊余豈
能詩對此仰高格撫卷吟寒空中心聊自適

樂善堂全集定本恭錄

右謹依

欽定四庫全書

欽定四庫全書
會要

大全集目錄

卷一

樂府一百零三首

卷二

樂府六十八首

琴操四首

辭三首

三言一首

三四言一首

卷三

五言古詩八十八首

卷四

五言古詩八十四首

卷五

五言古詩六十八首

卷六

五言古詩九十一首

卷七

五言古詩五十八首

卷八

七言古詩四十二首

卷九

七言古詩四十三首

卷十

七言古詩四十九首

卷十一

長短句體四十首

卷十二

五言律詩一百八十三首

卷十三

五言律詩七十九首

五言排律二十三首

卷十四

聯句六首

六言詩九首

七言律詩七十一首

卷十五

七言律詩一百五十首

卷十六

五言絕句一百八十八首

卷十七

七言絕句一百六十一首

卷十八

七言絕句一百六十三首

臣

等謹案大全集十八卷明高啟撰啟字季

迪長洲人元末避張士誠之亂隱居松江之

青丘自號青丘子洪武初召修元史授翰林

院國史編修官至戶部侍郎後坐撰魏觀上

梁文被誅年僅三十九所著有吹臺集江館
集鳳臺集婁江吟稿姑蘇雜詠凡二千餘首
自選定為岳鳴集十二卷凡九百餘首啓沒
無子其姪立於永樂元年鏤板行之至景泰
初徐庸掇拾遺佚合為一編題曰大全集劉
昌為之序即此本也啓天才高逸實據明一
代詩人之上其於詩擬漢魏似漢魏擬六朝

似六朝擬唐似唐擬宋似宋凡古人之所長
無不兼之振元末纖穠縟麗之習而返之於
古啓實為有力然行世太早殞折太速未能
鎔鑄變化自為一家故備有古人之格而反
不能名啓為何格此則天實限之非啓過也
特其摹仿古調之中自有精神意象存乎其
間譬之褚臨禊帖究非硬黃雙鉤者比故終
不與北地信陽太倉歷下同為後人詬病焉

乾隆四十二年五月恭校上

總纂官臣紀昀臣陸錫熊臣孫士毅

總校官臣陸 費 壤

欽定四庫全書

目錄

五

大全集原序

故嘉議大夫戶部侍郎前翰林國史院編修官授諸王
經青丘先生高啓文集一十八卷舊一千若干篇今二
千若干篇儒士徐庸字用理之所廣也用理既以類廣
先生文集乃以示昌昌謹為序之曰夫將以所學明先
王之道救當世之弊則必著於言焉庶幾見者之用聞
者之有考也六經更聖人之手其言粹然一出於正要
之所以存鑒戒者亦多聖人既歿縱橫捭闔之說興大

道幾微漢廣游學之路董生賈誼始各以其學自見著書數千萬言沉雄簡奧其明先王之道陳當世之務畧備矣唐韓愈起力變八代之衰習故其言惟醇而杜甫李白又各以其學自見明王道具時政謂之詩史宋歐陽修博學力行本論之言有益於治至朱元晦則根據六經之旨攘斥百氏之非歸然為世儒宗其大要使人審王伯之畧致義利之辨而已今諸家之言具存考之可知用之猶尚可行也蓋三代而下漢唐宋之所以聳

德著業而繼焉以稱治者有賴於是焉先生生元丙子
少稟神慧長讀六經諸家之言融而通之會而成之又
取而力行之其發之於言則浩乎如大川之決防也鏘
乎如洞庭之張樂也儻乎如幽壑之舞蛟也致之於用
則如射者之於的準乎其無疑也然值國步之既促不
苟於用隱於青丘登高望遠撫時懷古其言多激烈慨
慷若將於世無足為者及我太祖高皇帝定鼎建業肆
詔徵賢先生起與元史之修錄善醜惡儒者之功庶幾

彰施史成授諸王經進戶部侍郎尊顯極至先生感之
力頌先王之道以匡濟世務言多雄偉竒古足以聳張
德業裨益治化時甚賴之未久即辭去去後即蹇連以
死嗚呼殆天所以厄斯文也嘗竊論焉天道惡滿取之
不可以全然訛其身則必信其聲是以董賈貶逐而名
長甫自窮放而詩傳韓愈歐陽修朱元晦雖號通而未
免罷斥然其言至於今誦習而師承者不衰正柳宗元
所云生而不遇死則垂聲者衆也先生始三十有九使

少優游而待之則德將止於是乎言將止於是乎行將止
於是乎嗚呼天實為之謂之何哉用理師學於先生之
言得之既深遂勒圖傳之亦使聞者考之而可知見者
用之而可行以明其言之果有賴於世也嗚呼厚矣景
泰元年庚午冬十二月望日賜進士出身吳劉昌序

欽定四庫全書督要卷一萬六千六百十二

集部

大全集卷一

明 高啟 撰

古樂府

上之回

聖主重行幸六虯法乾旋北巡初避暑東祠已祈年羣
官從清塵粲若星麗天前揚豹尾竿左靡魚須旛瀚海
通漢月蕭閑絕胡煙願奉千齡樂皇躬長泰然

君子有所思行

騁望京輔地金城千里餘峩峩松柏陵靄靄桑柘墟明
堂表青陽飛觀切紫虛况有戚里第高樓夾清渠愛妾
舞羅縠嬖奴鳴珮琚東園賜祕器上林乘副車玄運有
恒旋盛時無久居勿喰城南菴寂寞揚雄廬

李夫人歌

延年罷歌少翁望蘭芬淒淒銷復悵臨歿最難忘欷歔不
相嚮陳杯觴列燈火是耶非惺中坐新宮漏殘星欲墮

古別離

他
人
豈
不
別
所
別
諒
有
由
嗟
君
今
何
營
輕
薄
好
遠
遊
遙
京
洛
車
汎
汎
江
漢
舟
君
身
非
賈
胡
所
至
自
輒
留
徽
音
已
冥
邈
思
懷
尚
綢
繆
露
滋
紅
蘭
春
霜
變
綠
桂
秋
此
時
望
歸
來
含
情
上
高
樓
川
途
本
無
限
君
去
焉
得
休
願
令
中
斷
阻
化
彼
山
與
丘

燕歌行

清商變節朱火違嚴霜塗庭卉木腓邊城早寒未授衣

念君遐征不能歸涼風時來動中闈
螢蜎在戶熠燿飛
賤妾宵興歎無依簪珥不施減容輝
欲寫憂思撫瑤徽
君今不在聽者稀啟明未出燈已微
愛而不見徒歎欷

吳趨行

僕本吳鄉士請歌吳趨行吳中寶豪都勝麗古所名五
湖洵巨澤八門洞高城飛觀被山起游艦沸川橫土物
既繁雄民風亦和平泰伯德讓在言游文學成長沙啟
伯基異夢表休禎舊閭凡幾家奕代產才英遭時各建

事徇義或騰聲財賦甲南州詞華竝西京茲邦信多美
粗舉難備稱願君聽此曲此曲非誇盈

南山有鳥

南山有鳥北山羅兩地一失驚風波哀鳴獨宿心靡他
竟抱幽恨歸山阿不及山上松纏綿同女蘿君歸來聽
妾歌相思感君情意多贈君明珠淚滂沱死生茫茫終
奈何

玉波冷雙蓮

金風暮剪雙頭藥帝臉辭秋嫣血紫宮女三千罷笑喧
錦雲障冷鴛鴦死滿江煙玉流古香尋魂弔影愁茫茫
吳天墜露哀紅濕一夜波涼小龍泣

藥秀蘂華

春香上羅襦暗引蘭橈渡蝶散掩紅房王孫歸已暮斜
條拂蛾鬢采擷同芳杜脈脈雨煙濃江臯斷腸路

吳鈞行

吳鈞若霜雪吳人重遊俠樽前含笑看上有仇家血

短歌行

置酒高臺樂極哀來人生處世能幾何哉日西月東百
齡易終可嗟仲尼不見周公鼓絲拊石以永今日歡以
別虧憂因會釋燕鴻載鳴蘭無故榮子如不樂白髮其
盈執子之手以酌我酒式咏短歌爰祝長壽

白馬篇

白馬銀鏤鞍流光皎如練龍沙積雪裏一去誰當見昨
日羽林兒獨拜建章殿天子親賜與騎向交河戰疾驅

不辭家恐獲遐邇謹萬里倏若飛神速虜難變前收日
逐走右斷康居援事定入關來箭中有餘箭

宛轉行

宛轉復宛轉宛轉日幾迴君腸鹿盧斷我腸車輪推

長門怨

憎寵一時心塵生舊屋金苔滋銷履迹花速度鑿音幕
雀重門迴秋螢別殿陰君明猶不察妒極是情深

班婕妤

微誠雖可守妙舞却難工已別增成舍初來長信宮扇
歸秋篋裏燭滅夜帷中莫忌爭新寵曾辭玉輦同

問闈篇

天門迎旭開紫霞八表洞達春無涯閣道萦迴度駕車
羽旗揚彩鐘鼓趨後宮三千人秀色掩盡世上花宸遊
時過廣成家瑤觴再壽盛露華一仁興萬福加何須慕
神仙辛勤鍊丹砂小臣微詞欲拜獻帝德自大非為誇

塞下曲

日落五原塞蕭條亭堠空漢家討狂虜籍役滿山東去
年出飛狐今年出雲中得地不足耕殺人以為功登高
望衰草感歎意何窮

折楊柳歌詞

二首

高枝拂翠憊低枝垂綺筵春風千萬樹此樹妾門前

其二

江頭橫吹悲北客休南去聞道武昌門愁人無別樹

空侯引

濁流赴海東若傾津卒刺船朝不行公乎提壺徑欲渡
大聲呼公公不顧飢鯨饑蛟肆啖吞竟以深淵作高墳
貪生惡死誰不有公獨不然果狂叟二十五絃彈且歌
公今渡河將奈何公今渡河將奈何

將進酒

君不見陳孟公一生愛酒稱豪雄君不見揚子雲三世
執戟徒工文得失如今兩何有勸君相逢且相壽試看
六印盡垂腰何似一危長在手莫惜黃金醉青春幾人

不飲身亦貧酒中有趣世不識但好富貴亡其真便須
吐車茵莫畏丞相嗔桃花滿谿口笑殺醒遊人絲繩玉
缸釀初熟搖蕩春光若波綠前無御史可盡歡倒著錦
袍舞鸕鷀愛妾已去曲池平此時欲飲馬能傾地下應
無酒爐處何苦寂莫孤平生一杯一曲我歌君續明月
自來不須秉燭五岳既遠三山亦空欲求神仙在杯酒

中

雨雪

雨雪暗桑乾
深愁沒馬鞍
臨關將月認
覆磧作沙看
不阻胡兒獵
聊供漢使餐
春風消不得
三月戍袍寒

其二

雨雪暗龍沙
愁陰入漢家
恨迷青冢草
驚見黑山花
夜積氈廬重
朝隨羽旆斜
空思鳩鶲觀
柳色變年華

羅敷行

陌上三月時
柔桑多綠枝
擣筐行采葉
日暮畏蠶飢君
來駐車馬相逢
在桑下謾說同心
言不是知音者
君貴

多輝光妾賤無紅妝自信田間婦難從天上郎長安畫
樓宇無限如花女使君當早歸莫共羅敷語

當壚曲

光艷動春朝妝成映洛橋錢多自解數箏澀未能調花
如秦苑好酒比蜀都饒深謝諸年少來沽不待要

遊俠篇

遊俠向何處蕩蕩長安城城中暮塵起殺人無主名所
殺豈私讎激烈為不平新削安陵刀光奪衆目明不畏

赤棒吏里間自橫行灌夫託為友袁盎事以兄負氣不
負勢傾身復傾情笑顧少年輩瑣瑣真可輕

關山月

月出遼海東朔雲捲胡風纔升榆塞遠復照柳城空影
滿雕弧外光沉金柝中思家舉頭望今夜一軍同

鞞歌行

玉蘊彩劒閼鋒牛鐸之音混黃鐘俾神奇作妾庸揚微
察陋世罕逢物有合勢必從如魚得水雲與龍夷吾囚

伊尹農二主舉之享萬鍾嗟古人孰繼蹤女子猶為悅
已容

古詞

妾刀不斷機郎行當早歸還將機中錦作郎身上衣

王明君

都門塵拂春風面臨別看花淚如霰君王惆悵惜蛾眉
不似前時畫中見白髮呼韓感漢恩寧胡謾號閼支尊
檀裘肉食本異俗不如但嫁巫山村黃沙白雪無城闕

手冷鷓弦夜彈歇相隨萬里到穹廬只有長門舊時月
妾語還憑歸使傳妾身沒虜不須憐願君莫殺毛延壽

留畫商巖夢裏賢

烏夜啼

啼鳥驚多棲未久半起疎桐上高柳燈下佳人顰淺眉
機中少婦停纖手月入空閨夜欲深數聲猶似聽君琴

行路難

君不見盤中鯉暫失風濤登俎几君不見枝上蜩纔出

糞壞凌雲霄推移變化詎可測勿謂明日同今朝出乘
高車入大馬半是當年徒步者范叔曾逃客溺餘衛青
亦在人笞下悠悠行路莫相欺為雌為雄未可知

其二

危莫若編虎須險莫若觸鯨牙行路之難復過此前有
瞿塘後褒斜杯酒朝驩矛刃夕加恩仇反覆間楚漢生
一家釣弋死雲陽鴟夷棄江沙所以賢達人高飛不下
避網置行路難堪歎嗟

其三

雕牀玉案刺繡茵宜城酒多光照春坐留北方之上客
歌侑南國之佳人盛時徂流若川水榮貴長存竟誰是
魏帝高臺碧瓦空梁王故苑黃塵起世人傾奪首未迴
可憐不飲冢纍纍

劉生

結客諸陵下平生好排難鶼瑩白楊刀鵠驚黃柘彈投
瓊遠邸夜擊筑高樓旦念無可報恩空椎車辟歎

怨歌行

妾始充下陳嬌容常自持上宮三千妓一一妒蛾眉絃急有斷聲鏡暗無妍姿遂令開時花遽作落後枝昨夕歌吹歡今夕蛩語悲從來班健仔不勝趙昭儀

雉子班

雉子班雔朝陽低飛蓬蒿隱文章五步一啄于彼山梁爭雄決鬪憤氣張好勇守介性之良安能受馴畜斂翼

自摧傷

萬里歌

素驂駕廣柳蕭蕭出城閨玄廬儼象設猶恐死有神古
原閒愁寃荒草不得春一作泉下客長違室中親昔興
每待旦今卧焉知晨斂衣已成灰含貝仍作塵家門諒
不遠欲歸竟何因平生所愛物娛玩由他人哀哉此里
中同逝壯老均聖賢亦豈免聞道庶可珍

薊門行

行行光祿塞望望單于臺天寒水草盡萬里孤軍來中

國多荒土窮邊何用開

巫山高

巴江西上巫峽深奇峰十二江之陰陽雲高臺不可尋
但見丹楓碧樹攢幽林昔聞瑤姬在其下月為環玦風
為襟空山久獨居偶感襄王心楚宮閑秋夢彷彿來同
衾神仙會遇當有道豈效世俗成荒淫千秋遺賦應多
恨暮雨蕭蕭猿自吟

上留田

有弟兄不見憐上留田行泣念彼先人上留田弟寒衣
不蔽身上留田兄富出乘華軒上留田死而棺槨不全
上留田他人為葬古原上留田我行見此孤墳上留田
白楊一何翻翻上留田人生孰無弟昆上留田爾獨大
義不敷上留田鄰人之歌悲不可聞上留田

董逃行

史侯稱臣董侯立山東義師烽火急羌兒夾輦奉西遷
百姓驅隨棄村邑草圭范中高作營千里不復聞雞鳴

舊宮焚燒無片瓦黃金盡出諸陵下長安城頭日欲晡

董逃歌殘歌布手

碧玉歌

碧玉小家女初無珠翠妝感郎相顧重朽質自生光

堂上歌行

堂上歌歌南山主人為歡仰客顏翠惟夜捲出兩鬟移
尊更飲花樹間花樹間有明月客不醉歌不歇

龍頭水

人間何處無流水偏到龍頭愁入耳夜雜羌歌明月中
秋驚漢夢空山裏龍坂崎嶇九迴折聲隨到處長嗚咽
欲照愁顏畏水渾前軍曾洗金創血回頭千里是長安
征人淚枯流不乾

少年行

官侍長楊拜夕郎况憑內寵在椒房賜金十萬身無用
乞作胡姬一日妝

其二

下直平明出禁門笑提博局伴王孫寶刀不敢將輸却

明日沙場欲報恩

芳樹

歲蕤映華闈窈窕臨清沼風姿巧弄春露氣微含曉垂
條拂過騎鷺葉留歸鳥忽憶共攀人徘徊行獨遠

放歌行

泰山玉檢書成功芝房正奏甘泉宮漢家五葉號全盛
有似白日初當中雄雞天上啼清曙春滿咸陽萬家樹

諸侯客子盡西來只道明時苦難遇褐衣不脫見至尊
立談一刻皆承恩賡詩已上柏梁殿獻賦還過金馬門
大道易登平若砥始信青雲纔咫尺共喜嚴徐得寵榮
未容絳灌生讒毀丹詔仍聞訪草萊皇心務欲攬羣材
嗟君猶在新豐邸日暮空歌歸去來

空城雀

空城雀何局促城頭飛城下宿百匝得一枝干啄逢一
粟衆雛隨啾啁所欲各易足不須羨彼珍羽禽翩翩高

集珠樹林一朝身陷虞羅裏回首空城不如爾

相逢行

沽酒渭橋邊平陵俠少年相逢各有贈寶劍與金鞍

妾薄命

寂寞復寂寞秋風吹羅幕玉階有微霜桂樹花已落昔
為卷衣女承歡在瑤閣棄魚感淚多當熊慙力弱寧知
色易老難求黃金藥宮深去天遠憂思將何託君恩非
不深妾命自輕薄微軀願有報和親死沙漠

神仙曲

上清真人古仙子保神鍊魄從無始眉上霜毫如髮長
幾見金烏日中死東遊不肯居蓬萊滄海頃刻飛黃埃
金輿玉座儼何處鬱藍天上彌羅臺碧桃落盡花無數
一笑虛空卷煙霧鳥篆玄文世莫窺茂陵還掩蓬科露
結客少年場行

結客須結遊俠兒借身報仇心不疑千金買得利匕首
摩挲誓許酬相知白馬繆胡纓行行人盡止朝遊洛北

門幕醉秦東市感君在一言不惜為君死朱家曾脫李
將軍田光終酬燕太子君不見魏其盛時客滿門自言
一一俱銜恩魏其既罷誰復見養士堂中塵網遍始知
結客難徒言意氣傾南山食君之祿有弗報何況區區
杯酒間結客不必皆薦紳緩急叩門誰可親屠沽往往
有奇士慎勿相輕問里人

長相思

長相思思何長愁如天絲遠悠悠揚搖風曳日不可量未

能絆去足唯解結離腸關山碧雲看欲暮空幃坐掩荃
蘭香長相思思何長

君馬黃

君馬黃我馬玄君馬金匼匝我馬錦連乾兩馬喜遇皆
嘶鳴何異主人相見情長安大道可並轡莫誇得意爭
先行搖鞭共踏落花去燕姬酒壚在何處

團扇郎

團扇團且潔人言似明月明月豈得如長圓不曾闕

楊白花

楊白花太輕薄不向宮中飛却度江南落美人踏踏連
臂歌山長水濶奈爾何奈爾何春欲晚何不飛去仍飛
返洛陽樹多啼鴉愁殺人楊白花

門有車馬客行

門有車馬客乃是故鄉士昔別各壯顏今見不相似上
堂敘情親拜跪出妻子對案未能食歷歷問桑梓當時
同遊人十有八九死松柏長新墳荆棘生故址歡言方

未終悲感還復始因思興謝端歎息不能止

估客詞

上客荊州商小婦揚州娼金多隨處樂不是不思鄉

櫂歌行

溶漾漢潭清寥荷趁浪平船輕知體弱簪滑見鬟傾落
日懸江思浮雲結浦情去從千葉隱歸愛一花迎吳歛
并子夜誰似棹歌聲

雞鳴歌

北斗城頭北斗低萬家夢破一聲雞馬蹄踏踏車轆轤
闕下連趨市中逐雄雞安得噤爾聲利名少息世上爭
漫漫夜長人不驚

華山畿

華山畿牛車止不同生可同死棺開棺開與郎去來

長安有狹斜行

長安有狹斜狹斜僅容騎路逢兩俠童廻鞭問君第君
第渭橋西易覓難復迷長子侍溫室次子籍金閨少子

備宿衛光耀與兄齊三子每來返雜沓擁輪蹄大婦彈
鶯雞中婦舞前溪小婦勸杯酒能唱白銅鞮丈人莫遽
起庭樹未烏棲

雙桐生空井

交生碧玉樹竝覆黃金井根通夕潤深葉帶朝光冷應
有感秋人時來鑑愁影

征婦怨

良人不顧封侯印虎符遠發當番陣幾夜春閨惡夢多

竟得將軍軍覆信身沒猶存舊戰衣東家火伴為收歸
妾生不識邊庭路尋骨何由到武威紙幡剪得招魂去
只向當時送行處

襄陽樂

門前黃柳鴉雛宿羅幌低垂婢擎燭懸璫結珮略妝成
日暮相邀漢江曲水靜花寒月小明舟中樓上鬪歌聲
腸斷年年大堤路南商行過北商行

飲酒樂

七絃五絃角奏一觴兩觴羽行且樂眼中人聚莫憂頭
上天傾

鳳臺曲

飛裙織霧秋痕薄星漢低宮花漠漠瓊臺夜寒閉羸女
鶯管參差隔煙語瑤京舊侶招遠遊人間帳冷鴛鴦愁
海影無塵月如夢仙骨不欺鸞背重衰蘭泣露空秦苑
叢玉聲微彩霞遠

美女篇

美女婉清揚白皙纖且長艷色照上國不殊古姬姜巧笑發令姿芳詞吐柔腸耀首有何物黃金作釵梁珥懸礧珂珠韞帶霍綺香新服製羅紝光輝麗青陽上袂繡蝶下裙纖駕鴛姍步春風乍見驚欲翔雖有楚大夫善賦焉能詳豈徒騁妍媚况乃持貞良家居闢高門宛在城中央過者共傾慕日晏停上襄借問誰氏子無非金與張蹇修豈不勤通辭重珪璋中懷非所託鴈幣徒相將永宵歎遲回起倚東西扇君子苟未得年徂諒

何傷

將軍行

將軍結髮從鞍馬新領前軍號橫野面謾不數屠狗兒
負勇曾擒射鵰者狼星掃天芒角斜大旗獵獵吹風沙
黃金傾盡養部曲匈奴未滅何為家前日賢王五千騎
直入朝那殺邊吏天子初聞怒赫然出師誓奪河南地
五營材官元自多詔書未須徵七科已御明堂推畫縠
還開武庫授彫戈灞陵原頭軍晚發北出雲中與高闕

單于一夜六驃逃大漠無人唯漢月塞下從茲烽火稀
朝臣共賀震皇威人生寧似功成樂白日長安鼓吹歸

長安道

長樂鐘聲動平津樹色開中郎長戟衛丞相小車來新
成賜將第更築侯神臺誰念公車客空懷作賦才

洛陽陌

九陌看春光紅塵起相接白玉車中郎綠珠樓上妾柳
迷臨水影花暎當爐頰日暮過銅駝相逢盡豪俠

悲歌

征途險巇人乏馬饑貧少不如富老美遊不如惡歸浮
雲隨風零亂四野仰天悲歌泣數行下

邯鄲郭公歌

郭公舞郭公舞天子無愁亦無苦醉後君臣一笑看鄴
宮長夜鼈鼈鼓郭公郭公爾莫舞不解平陽圍竟作長
安虜高山推為一杯土

車遙遙

鵝雞啼霜海城白征夫趣裝牛上輶天生兩轂轉長途
那得令君不為客出門已遠第一程耳中鳴鐸漸無聲
房戶寧嗟寂寞守山川唯念苦辛行欲車不行顧車覆
還愁損我車中玉安得身如芳草多相隨千里車前綠
楚妃歎

章華臺前楚江水月色墮煙烏欲起六宮不敢解羅衣
獵火照山君未歸

神絃曲

秋燈晝辟熏煙埃石馬汗流神下來花衫娑娑絃切切
旋風吹幡愁百結雌狐學拜戴髑髏鬼箭射創血灑秋
老鴉飛散巫嫗泣苦篁嘯雨溪幽幽

白紵詞

白紵出自吳女工著來色與素體同舞時偏向江渚宮
長袖拂起微有風觴催管促四座中攬裾徘徊慘曲終
玉階夜寒零露濃

其二

出後閣臨前檻舞衣皎皎潔且輕飄如白雲向空行廻
腰流目君已傾華燈吐燄欺月明喧譁不聞遺珮聲朱
萸實紅蘭葉紫千秋歡樂長如此妾身得向君前死

阿那瓌

牛羊草漫野大帳天山下十萬控弦兒聞笳齊上馬

江南意

妾本南國姝父母愛如珠貌豈慙明鏡身纔稱短襦學
成采蓮唱晚出橫塘上舟小復身輕隨風雨搖蕩歸時

曲岸傍恰見貴遊郎
輶歌欲轉棹花淺不堪藏
將嗔却成哂相問
那能隱雖憐郎意深終嫌妾家近
回首各盈盈

南湖月又生
烟波三十里都是斷腸情

銅雀妓

鄴宮已罷幸歌舞尚如期誰知看月夜却是望陵時
鄉澤銷羅薦松風吹總惟妾身未得死寧當憂色衰

猛虎行

陰風吹林鳥鵠悲猛虎欲出人先知目光瞳瞳當路坐

將軍一見弓矢墮幾家挿棘高作門未到日沒收猪豚
猛虎雖猛猶可喜橫行只在深山裏

湘中絃

涼風嫋嫋月粼粼竹色蘭香秋水濱一夜猿聲流淚盡
黃陵祠下泊舟人

獨不見

白日沉大荒北風下天霜羅幃猶苦冷何況戍遼陽別
時秦槐青今復胡草黃紅淚常自滋非因效啼妝駕機

促夜響龍鏡掩晨光相思獨不見時久愈難忘

艷曲

日暮淇水上折花行見歡駕鴛蘇合彈騁衷鏤衡鞍

其二

當時贈芍藥今日歎蘿蕪少年不相顧唯愛執金吾

羽林郎

十五能挽弓入衛葡萄宮武皇深假借父有沒邊功禿
衿繡羅短馬逸雙銜斷纔出鬪雞坊還過射熊館笑擲

朱提銀娼樓爛醉春歸時衝市過辟易九衢人橫行自
無避司隸休相忌明日浚稽山為君遮虜騎

燕燕于飛

燕燕何處飛相見江南路
賓香細雨春柳色芳煙暮
纔從箔外歸復向舟前度
莫入未央宮身輕有人妒

浮游花

宛宛庭中花狂風忽吹去無涯上入逍遙之雲天下沒
慘澹之泥沙開落本同何足歎升沉偶異自堪嗟

野田行

白楊樹下誰家墳火燒野草碑無文路旁尚卧雙石馬
行人指是故將軍當時發卒開陰宅千車送葬城東陌
子孫今去野人來高處牧羊低種麥平生意氣安在哉
棘叢暮雨棠梨開百年富貴何足恃雍門之琴良可哀

壯士行

無險非高山無勇非壯士半夜殺風來劍寒燈欲死

邯鄲才人嫁為廝養卒婦

妾能撫趙瑟舊得君王眷更衣直夜房侍酒登春殿出
宮非故顏里婦猶相羨叢臺罷往夢破屋流螢見末路
多若斯紛紛貴成賤

秋風引

嗟爾秋風胡為來哉奏商律兮瑟颸而悲哀叩喬柯而
墮葉掃廣路以清埃入班姬之永巷過襄王之高臺瑤
琴自鳴羅幃齊開馬蕭蕭而嘶起鴻噭噭以翔廻使崩
雲駭浪振蕩於白日兮忽欲去而徘徊客有懷鄉失職

而對此者恨盈襟而難裁但欲變天地之搖落不知感
節序之摧頽秋風生歸去來

涼州詞

蓬婆城下淨無花慘慘黃雲漠漠沙卷葉誰將番曲奏
白頭都護亦思家

其二

關外垂楊早換秋行人落日旆悠悠隴頭高處愁西望
只有黃河入海流

虞美人曲

明月帳中泣悲風營外歌彷徨夜驚起何事楚人多迴
燈擁綠髻向劍感青蛾效命自無限君王其奈何

築城詞

去年築城卒霜壓城下骨今年築城人汗灑城下塵大
家舉杵莫住手城高不用官軍守

永嘉行

帝衣濺血忠臣死五部初興屠各子宣陽門外曉吹笳

持戟誰為衛宮士滿城草綠胡馬嘶內家散作軍中妻
六壘相隨渡河去月明歸夢遂成迷萬里中原非典午
至令人說王夷甫

神女宛轉歌

駐君舟相見盡綢繆已遣大姬傾鑿落復令小婢進箜
篌歌宛轉宛轉意何長願為灰與火同泛玉爐香

其二

解妾珮相貽慰離異愁逐朝霞天際生歡隨秋水江頭

逝歌宛轉宛轉情相續願為絃與軫共奏瑤琴曲

東門行

出東門暮歸來入室四壁空突中無煙甑生埃弱妻蓬頭稚子瘦使我心下忽有哀安能學東方生空抱國士才身長七尺齒編貝索米不得取笑咍雞鳴東門早欲開仗劍當遠去不乘駟馬不復廻妻前挽衣言君可棄妾奈此呱呱孩君莫憂無糧田中已生稼君莫憂無裳機中布成尚可裁不須苦慕富貴富貴多有害蓄賤妾

與君生同居死即共作山下灰吾欲行為徘徊仰視蒼
天重咄哉

大全集卷一

欽定四庫全書會要卷一萬六千六百十三集部

大全集卷二

明 高啟 撰

樂府

愛妾換馬曲

出幃掩紅袂離廤結青絲我取躡雲足君憐羞月姿惟
當樹功業詎必戀恩私回首各已遠春山將暮時

美人磨鏡詞

匣中舊鏡龍蟠背昏盡如同月逢晦尋得街頭負局翁粉鉛和
汞拭青銅須臾瑩徹無纖翳試整朝來暗梳髻光明還在只
如新悔向塵埃久相棄明日照儂自畫眉不須問郎宜不宜

朝鮮兒歌

朝鮮兒髮綠初剪齊雙眉芳筵夜出對歌舞木綿裘軟
銅鑼垂輕身回旋細喉轉蕩月搖花醉中見夷語何須
問譯人深情知訴離鄉怨曲終拳足拜客前鳥啼井樹
蠟燈然共訶玄菟隔雲海兒今到此是何緣主人為言

曾遠使萬里好風三日至鹿走荒宮亂寇過雞鳴廢館
行人次四月王城麥熟稀兒行道路兩啼飢黃金擲買
傾裝得白飯分餐趁船歸我憶東藩內臣日納女椒房
被禕翟教坊此曲亦應傳特奉宸遊樂朝夕中國年來
亂未鋤頓令貢使入朝無儲皇尚說居靈武丞相方謀
卜許都金水河邊幾株柳依舊春風無恙否小臣撫事
憶昇平尊前淚瀉多於酒

野老行

桑扈初鳴麥花落大家小家蠶滿箔村中無吏夜捉人

老身醉歸行失脚自從明府一下車短衣糲飯即有餘

姓名免籍弓拏手新婦辟纏兒讀書縣門前頭柳飛絮

春風又隨官馬去雞鳴相送拜道邊願公受取一大錢

秋江曲送顧使君

秋江月滿秋潮大江上行人待潮過別離休說渡江難
半日順風船穩坐楚江茫茫葭菼平使君來時雄雉鳴
子弟從軍隔江去幾家猶住夕陽城水田雖荒飯常足

芡米夜春二十斛誰道繁華不及前戶無征稅官無獄
渡江渡江君莫留江北樂似江南秋

湖州歌送陳太守

草茫茫水汨汨上田蕪下田沒中田有麥牛尾稀種成
未足輸官物侯來桑下搖玉珂聽儂試唱湖州歌湖州
歌悄終閑幾家愁苦荒村月

秦箏曲

嬌絃細語發研羅臂動玉釧鳴相和闋雲隴月愁思多

愁思多聽此曲停蜀琴罷燕筑

從軍行

關中惡少年召募去防邊匈奴入寇塞將軍下自天揚
旌三道出列格五營連龍城望兵氣馬邑斷人烟星攢
烽夜舉月偃陣朝圓渴飲疏勒水饑餐屬國羶名勇單
于憚功多天子憐寧令寶車騎獨擅勒燕然

大梁行

大梁四面平如砥西去咸陽一千里魏王此地昔為都

宮闕中天碧雲起車聲輶輶夜未休帶甲十萬名蒼頭
撞鐘列鼎宴上客奉金走幣連諸侯信陵真是賢公子
富貴不驕天下士已訪侯羸到里門復迎朱亥經屠市
傾身折節世莫同緩急竟賴斯人功邯鄲秦軍一椎破
七國震動聞英風古城重過為搔首幾度秋風落楊柳
洛上應無鴻鴈來苑中只有狐狸走立馬塵沙日欲昏
悲歌感慨向夷門豪華多少同銷歇獨有高名今尚存

東飛伯勞歌

前飛蜻蜓後飛蝶桃葉楊枝每相接誰家季女弄春妍
披煙映日窓戶前金雀雙釵翠羽扇繡屏黼帳文羅薦
嬌羞年幾十五多將呈復隱奈愁何流暉倏沒百花暝
空持可憐誰作並

春江花月夜

皓月金波滿竒花玉樹新浮輝與流艷併弄一江春還
持誰可比結綺閣中人

踏歌行

香塵和露踏成泥花下風寒鬢脚低夜靜高樓有人聽
起頭一句唱教齊

子夜四時歌

白白復朱朱芳條胃繡襦摘來隨女伴賽鬪不曾輸紅
妝何草草晚出南湖道不忍便回舟荷花似郎好堂上
織流黃堂前看月光羞見天孫度低頭入洞房空帷擁
爐坐夜冷微紅減郎意似殘灰無因得重熱

迎送神曲

薦芳兮奠醑
斲冰為梁兮
葺荷以為宇
神不來兮孰與
處空山
愀兮暮多雨
渺吾望兮瀟湘
雲冥冥兮水茫茫
有美人兮在堂
盍歸來兮故鄉

導赤鯉兮從玄鼈
冷風回兮水驚波
儼靈旗兮來下巫
撫節兮安歌
安歌兮未急條
廻輶兮山之側
南有淵兮北有湫
神不留兮我心憂
願歲來兮惠我秋

有所思

有所思兮安在
煙霧迢迢隔南海
昔年遺我翡翠裘
篋

中久閉銷光彩宛如神仙在瀛洲乘濤欲至風引舟同心之人乃離阻嗟我處此將何求

吁嗟篇

惻惻抱深隱靡靡踰崇丘凜凜歲欲徂役役車未休不辭車未休但傷歲莫留窮陰蔽九野徒旅同時憂豺虎當路啼猿猴出林遊我飢雪作糧我寒又無裘徒思陽春日誰返羲和轉天時自有常淚下還復收

擊筑吟贈張贊軍

擊筑上君堂君心不可忘哀聲流易水憤氣激咸陽不
向諸侯座寧來刺客塲今朝特前奏為我一停觴

苦哉遠征人

悠悠荷戈子謫發事遠征遠征無窮期千里萬里程瞻
斗知鄉遠覽物悟歲更霜露鑠肌膚弊鎧蟻虱生况茲
三邊虜騎黠未易平聞笳已心摧赴刃仍骨驚軍興有
嚴誅賤命顧自輕區區在行間敢望竹帛名奈何久不
還主將功未成誰憐城南室思婦感鶴聲

鑿渠謠

鑿渠深一十尋鑿渠廣八十丈鑿渠未苦莫嗟吁黃河
曾開千丈餘君不見賈尚書

荆門壯士歌

水洶洶冰差差荆門葉黃杪秋時上有騰攫之猿猱下
有饑嚼之蛟螭悲哉此路難孰敢徑渡之三撫髀壯士
起劍風騷勞髮上指仰天長歌不見星哀鴻夕呌雲冥冥

冥

城虎詞

候潮門開啼早鴉有虎忽入居人家母兒畏竄雞犬伏
排籬突戶誰能遮獰風動樹初哮吼驚起東營捉生手
怒拔長戈試一春目光落地悵魂走南山藜藿深冥冥
白日橫行誰敢櫻胡為離窟來城市牙爪雖全不能恃
君不見壯士遭急縛失路窮時亦如此

寒夜吟

月下凍痕生綠井隔簾霜片飛無影樹枝風息轉凝寒

愁人如烏棲未安夜短夜長應獨覺熒熒殘燭嗚嗚角

戍婦詞

妾在當奉姑郎行當報君男女各有役死生從此分

羈旅行

馬頭北風吹地白手冷時驚墮鞭策隻堠欲來雙堠過
客程不盡關山多狐狸縱橫古城壞旗折官亭無酒賣
土風處處殊故園鄉音只聞僮僕言天涯歲晚無相識
囊金已空歸不得暝投人家自炊黍土屋青燈鴈啼雨

此時暫解羈旅憂夢與家人夜深語人生出門即苦辛
何況長為萬里身遠遊縱得功名好不如貧賤鄉中老

小長干曲

郎采菱葉尖妾采荷葉圓石城愁日暮各自撥歸船

春江行

春江南北疑無岸綠草綠波連不斷一女紅妝出浣紗
恰如鏡裏見桃花挾衣猶冷過寒食雲度春陰半江黑
浦口風多潮正深輕舟搖蕩愁人心鶯鵠暮啼歸路遠

飛絮茫茫楚王苑

寄衣曲

郎寒甚妾寒持衣向燈泣不是手縫遲綿多針線澀

其二

賜袍非不煖妾製稱郎身寄去龍堆遠端愁到已春

廢宅行

鳴珂坊裏將軍第列戟齊收朱戶閑里媼逢人說舊時
有廬被奪廣園池今年沒入官為主散盡堂中義宅兒

廚煙久斷無梁肉羣鼠飢來入鄰屋官封未與別人居
日日閒苔雨添綠曲閣深沉接後房畫屏生色暗無光
尋常不敢偷窺處守卒時來拾墜璫春風多少竒花樹
又有豪家移得去

青樓怨

浴金熏爐鏤玉奩蘭香今夜為君添烏棲黃昏烏起曙
纔見道來還道去

聞角吟

驚起黃榆塞下鴻一聲嗚軋戍樓空此時吹動關山意
十萬征人歸夢中玉帳彎弓夜初起月白不知霜似水
餘聲散作滿天愁風吹不入單于壘

刺促行

刺促復刺促天高白日速黃鸝長苦飢烏鳶飛食肉促
刺復促刺長途多荆棘但見今人行不逢古人跡

牧牛詞

爾牛角彎環我牛尾禿速共拈短笛與長鞭南隴東岡

去相逐日斜草遠牛行遲牛勞牛飢惟我知牛上唱歌
牛下坐夜歸還向牛邊卧長年牧牛百不憂但恐輸租
賣我牛

捕魚詞

後網初沉前網起夫婦生來業淘水忽驚網重力難牽
打得長魚滿船喜不教持賣去南津且向江頭祭水神
願得年年神作主無事全家卧煙雨不論城中魚貴賤
換得酒歸儂不怨

養蠶詞

東家西家罷來往晴日深窓風雨響二眠蠶起食葉多
陌頭桑樹空枝柯新婦守箇女執筐頭髮不梳一月忙
三姑祭後今年好滿簇如雲繭成早檐前繅車急作絲
又是夏稅相催時

射鴨詞

射鴨去清江曙射鴨返廻塘晚秋菱葉爛煙雨晴鴨羣
未下媒先鳴草翳低遮竹弓彀水冷田空鴨多瘦行舟

莫來使鴨驚得食忘猜正相關
觜唼唼毛褪褪潛機一發那得知

伐木詞

竹擔挑多兩肩赤礪斧時尋
澗邊石老夫氣力秋漸衰
易所喜有枯林枝白雲無人暗
空谷遠聲丁丁如啄木暮歸
待伴不獨行前途虎多荆棘
生長年不曾到城府聞比山中
路尤阻

打麥詞

雉雛高飛夏風煖行割黃雲隨手斷疎莖短若牛尾垂
去冬無雪不相宜場頭負歸日色白穗落連枷聲拍拍
呼兒打曬當及晴雨來怕有飛蛾生卧驅鳥雀非愛惜
明年好收從爾食

采茶詞

雷過溪山碧雲暖幽叢半吐槍旗短銀釵女兒相應歌
筐中摘得誰最多歸來清香猶在手高品先將呈太守
竹爐新焙未得嘗籠盛販與湖南商山家不解種禾黍

衣食年年在春雨

賣花詞

綠盆小樹枝枝好花比人家別開早陌頭擔得春風行
美人出簾聞叫聲移去莫愁花不活賣與還傳種花訣
餘香滿路日暮歸猶有蜂蝶相隨飛買花朱門幾迴改
不如擔上花長在

洞房曲

洞房香吐合昏花月轉勾欄啼乳鴉今宵有酒留君醉

不信娼家勝妾家

待月詞

漏板敲愁夜驚冷露井桃花濕無影海風吹星銷碧煙
羿妃妝遲鏡未懸素鸞不來桂香死雲外紫笙呼夢起
瓊樓欲開天半紅徘徊望拜娥池東蘭闌未返燈寒後
恰似前宵待郎久

惜花歎

惜花不是愛花嬌賴得花開伴寂寥樹樹長懸鈴索護

叢叢頻引鹿盧澆幾回欲折花枝嗅心恐花傷復停手
每來花下每題詩不到花前不持酒準擬看花直盡春
春今未盡已愁人纔留片萼依前砌全落千英過別鄰
懊惱園中妒花女畫旛不禁狂風雨流水殘香一夜空
黃鸝魂斷無言語縱有星星在蘚衣拾來已覺損光輝
只應獨背東窓卧夢裏相隨高下飛

照鏡詞

君家青銅鏡價重比黃金空持照人面不持照人心

田家行

草茫茫水汨汨上田蕪下田沒中田有禾穗不長狼籍
只供鳬鴈糧雨中摘歸半生濕新婦春炊兒夜泣

憶遠曲

楊子津頭風色起郎帆一開三百里江橋水柵多酒壚
女兒解歌山鷓鴣武昌西上巴陵道聞郎處處經過好
櫻桃熟時郎不歸客中誰為縫春衣陌頭空問琵琶卜
欲歸不歸在郎足郎心重利輕風波在家日少行路多

妾今能使烏頭白不能使郎休作客

金井怨

照水羞見影汲水嫌手冷閒立梧桐陰烏啼秋夜永

送客曲

送客車在門勸客杯在手明日長安花今夜宜城酒願
客飲此勿復辭我無黃金為客壽人生無處無弟兄鄉
里刺促誰知名賣書買得百金劍有身須向關山行馬
四蹄車兩轂行人欲發休躡躅嚙嚙雞鳴赤日旭

里巫行

里人有病不飲藥神君一來疫鬼却走迎老巫夜降神
白羊赤鯉縱橫陳男女殷勤案前拜家貧無殼神勿怪
老巫擊鼓舞且歌紙錢索索陰風多巫言汝壽當止此
神念汝虔賒汝死送神上馬巫出門家人登屋啼招魂
主客行

主人楚歌客楚舞落日黃雲鴈聲苦笑拂腰間寶劍光
美人滿堂色如土大兒北海人中奇小兒能讀曹娥碑

相逢且莫歎貧賤但願有酒無別離君不見平原墓上
生秋草國士無窮道傍老

春夜詞

杏煙濕鬢秋遷下銀蠟光寒曲屏畫數漏閒過每睡時
月明微見墮游絲欲歸自踏娉婷影風動玉釵花亦冷
屋貯嬌愁鎖慢紗青絲嘶騎醉誰家管絃不動空臺榭
夢與烏衣語中夜

新絃曲

舊絃解新絃張冰絲牽愁六尺長寬急頻從指邊聽金
鴈參差移不定新絃響高調易促不如舊絃彈已熟憐
新厭舊妾恨深為君試奏白頭吟他日愁如舊絃棄泣
向羅裙帶頭繫

竹枝歌

蜀山銷雪蜀江深郎來妾去鬪歌吟峽中自古多情地
楚王神女在山陰

其二

魚復浦上石纍纍恰似儂心無轉迴船歸莫道上灘惡
自牽百丈取郎來

其三

江水出峽過夔州長流直到海東頭郎行若有思家日
應教江水復西流

其四

躑躅花紅鵝鷄飛黃牛廟下見郎稀大艖攤錢賣鹽去
短釵簪葉負薪歸

其五

妾愛看花下渚宮郎思沽酒醉臨邛春衣未織機中錦
只是長絲那得縫

其六

楓林樹樹有猿啼若箇聽來不慘悽今夜郎舟宿何處
巴東不在定巴西

轉應詞

雙燕雙燕去歲今年相見往來東舍西家銜得泥中落

花落人在暮寒池閣

其二

疎雨疎雨綠滿蘿蕪洲渚江南相憶故人遠水遙山暮
春春暮春暮風急畫船難渡

五雜組

五雜組駝背鶯往復還渡口船不獲已非少年

其二

五雜組錦繡旗往復還更戍兒不獲已遭亂離

五噫歌

吊梁伯
鷺墓

顧瞻亭臯兮噫丘墳有萬兮噫鬻春亦勞分噫危邦可逃兮噫先生何高兮噫

疊韻吳宮詞

筵前憐嬋娟醉媚睡翠被精兵驚升城棄避愧墜淚

鶴媒歌

鶴媒獨步荒陂水仰望雲間飛不起遠看過鳥下南汀鼓翼相迎似相喜共為羽族生水鄉暫從飲啄無猜防

草盾俄閑中潛弩弋師歡笑媒矜舞嗟爾高潔非凡禽
胡為徇食移此心受人馴養忘遠舉好陷同類機腸深
嗚呼世間幾人號君子得利相傾亦如此

牛宮詞

豕眷于笠雞棲于埘嗟爾烏犍何所止斯歲聿云暮雨
霜以風乃築環堵以為爾宮既用爾力宜恤爾寒庇處
密固我心孔安

照田蠶詞

東村西村作除夕高炬千竿照田赤老人笑祝小兒歌
願得宜蠶又宜麥明星影亂棲鳥驚火光辟寒春已生
夜深然罷歸白屋共說豐年真可卜

琴操

風樹操

予自傷早失
恃怙而作

朝風之飄飄兮維樹之搖搖兮吾思親之翹翹兮夕風
之烈烈兮維樹之揭揭兮吾思親之惙惙兮樹之有風
猶可息兮吾之無親終不可復得兮

之荆操

予思泰伯之德而作

粵我有土岐山之下孰是營之維我考祖今我于邁自此徂荆豈不懷歸念我弟兄民勿我思我斯安只國已有後先君季子

登丘操

登青丘有懷而作

驅車兮與馬蹇君行兮胡為乎在中野登彼兮崇丘下茫茫兮九州思君子兮不得與駕以遊山有出雲兮木亦有柯我將歸兮憂之如何

望歸操

哀周復子死
於虎而作

兒旦而出于山之麓兮兒夕不歸在虎之腹兮我往無
所榛蒙籠被谷兮嗟爾耽耽弗食我豕犢兮穴亦有子
胡寧使我獨兮

辭

望虞山辭

虞山峩峩兮出雲油油胡斂其施兮弗雨九州下有蛟
龍兮海波橫流誰使子來兮從伯氏以遊朝于濟兮望

岐周國有祀兮又何求唐虞逝兮道阻修慚德興兮干
戈日休我思夫人兮心焉孔憂

放鶴辭

登支遁放鶴亭而作

放鶴去當高飛啄莫爭雞鴦食遊莫近虞羅機雲山海
嶠堪來往明月千秋待爾歸

弔伍子胥辭

覽勾吳之故墟兮灌莽鬱其龍蕙館娃廢而為治兮錦
伍胥之遺宮奚千祀而勿毀兮繫若人之死忠昔窮逋

而渡江兮奮孤跡於羈旅既入郢而雪恥兮又棲越而攘侮使彼吳之強大兮非夫子而孰為何夫差之自喜兮遽忽戒而荒嬉陳昌言之悃欵兮實不忍視國之阽危衆以子為巨信兮肆讒辭之詆欺夫豈不能全身遠適以自庇兮顧先王之舊德卒待隕而抗言兮恨終不能悟君之嬖惑載鴟夷兮浮游魂惄惄兮在中流江神念子兮哀憤鼓洪濤於高秋嗟君子之出輔兮孰不願為伊臯使言從而志行兮致雍熙之陶陶何齟齬而多

患兮惟重華之不可以屢遭鄂侯諍而就醢兮龍逢諫
而見屠蓋自古而有之兮匪夫子獨罹乎此韋身雖沒
而義安兮又舍是將焉索彼循默而苟容兮寧獲免乎
汎額想子猶念夫故都兮或乘雲而來歸顧荆棘之多
露兮應攬涕而歔欷余亦何為而感慨兮懼直道之墜
也聊陳詞而表烈兮亦邦人之志也

三言

梧桐園

桐花香桐葉冷生宮園覆宮井雨滴夜風驚秋鳳不來

君王愁

三四言

王伯敬歌

舟初維琴始薦驛亭邊夜相見歌宛轉情綢繆解環珮
彈箜篌歌易闌情難歇江波寒墮明月綠壺再傾芳音
欲違譬彼林鳥逢晨各飛羅衣沾霜城烏忽起明日相
思孤棹千里

大全集卷二